

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalakkersuisut politikkikkut suliniutit pingaarutillit ingerlanneqartut, aningaasaqarnikkut suliniutit pingaarutillit inuiaqatigiinnilu suliassaqaarfinni attuumassuteqartuni allannguutit pingaarutillit pillugit, nalunaaruteqartarnermi nakkutilliinermilu aaqquissuussinerit pioreersut aqquutigalugit naammattumik paasissutissiissutigineqareersimanngitsut, Inatsisartunut aalajangersimasumik aaqquissuussaasumillu paasissutissiisarnissaq pisussaaffinngortillugu malittarisassanik suliqaarnissamik peqquneqarnissaannik Inatsisartut aalajangiiffigisassaattut siunnersuut. Malittarisassani suut pillugit paasissutissiisoqartassanersoq, paasissutissiissutit qanoq ilusilersorneqassanersut qanorlu akulikitsigisumik saqqummiunneqartassanersut aalajangersarneqassapput, aammalu suliassat pisariaqanngitsumik marloriaatinngorlugit ingerlanneqannginnissaat qulakkeerneqassalluni. Naalakkersuisut malittarisassanut siunnersuut kingusinnerpaamik UPA 2028-mi Inatsisartunut saqqummiutissavaat.

(Inatsisartunut ilaasortaq Isak Johannessen, Naleraq)

Tunngavilersuut:

Inatsisartut Naalakkersuisut suliaat pillugit paasissutissanik assigiinngitsunik ullumikkut pissarsisinnaareerput. Aningaasatigut pissutsit pillugit paasissutissat ilaatigut aningaasanut inatsimmi Nunattalu Karsiata naatsorsuutaanik kukkunerisuiarnermi saqqummiunneqartarput. Naalakkersuisut aamma misissueqqissaarnermik, iliuusissanut pilersaarutinik nassuiaatinillu ingerlaavartumik saqqummiussisarput, Inatsisartullu ilaasortaat § 37 naapertorlugu apeqquteqarnikkut ataatsimiititalianilu sulinikkut paasissutissanik allanik pissarsiniarsinnaallutik.

Periarfissat taakku pioreeraluartut suliniutit annertuut ingerlanneqartut pillugit paasissutissat ataatsimoortut piffissaagallartillugulu Inatsisartunut tamatigut saqqummiunneqartarnissaat qulakkeerneqanngilaq. Paasissutissat allagaatinut suleriaatsinullu assigiinngitsunut siaruarsimaneqarsinnaapput, suliniutillu killiffiat, aningaasatigut pingaaruteqarnera kingunerisinnaasaalu pillugit ataatsimut isigalugu paasissutissat aatsaat suliniut siuarsimalereersoq pissarsiarineqarsinnaasarlutik.

Siunnersuutip siunertarinngilaa nakkutilliinermut nalunaaruteqartarnermullu aaqquissuussinerit pioreersut taarserneqarnissaat imaluunniit pisariaqanngitsumik uteqqinneqarnissaat. Siunertarinqarpoq pissutsit pingaarutillit allatigut naammattumik paasissutissiissutigineqareersimanngitsut pillugit Naalakkersuisut qaqugukku Inatsisartunut paasissutissiisarnissaat ersarissumik ataasiusumillu malittarisassaqaartinneqassasoq.

Malittarisassat ilaatigut makkuninnga imaqartariaqarput:

- Politikkikkut suliniutit pingaarutillit ingerlanneqartut killiffiat, tassunga ilanngullugit misissueqqissaarnerit, piareersaanerit, isumaqatigiinniarnert suliniutillu nunatta ineriartorneranut annertuumik pingaaruteqalersinnaasut.
- Aningaasatigut iliuutsit annertuut, aarlerinaatit suliniutillu annertuut aningaasaqarnikkut kingunerisinnaasaat, paasissutissat aningaasanut inatsimmi, Nunatta Karsiata naatsorsuutaani imaluunniit nalunaaruteqartarnermi pioreersuni naammattumik saqqummiunneqareersimanngikkaangata.
- Inuiaqatigiinni suliassaqaarfinni attuumassuteqartuni allannguutit pingaarutillit politikkikkut pingaarnersiunermut imaluunniit aningaasatigut aalajangiinernut pingaaruteqalersinnaasut.
- Suliniutit annertuut pillugit aalajangiinerit imaluunniit aningaasatigut iliuutsit piviusumik allanngortikkuminaatsunngunnginneranni piffissaagallartillugu paasissutissiineq, Naalakkersuisut

ingerlatsinermut akisussaaffiat, isertuussinissamik pisariaqartitsineq isumaqatigiinniarnerrillu ingerlanneqartut eqqarsaatigalugit tamanna pisinnaappat.

- Paasissutissiisarnermut aalajangersimasumik ataasiusumillu ilusiliineq akulikissusiliinerlu, nalunaaruteqartarnernik pioreersunik pisariaqanngitsumik marloriaatinngortitsinngitsaq.

Naalakkersuisut inatsisit atuuttut Inatsisartullu akuersissutigisimasai aningaasaliissutit iluanni ingerlatsinermut akisussaasuupput, naalakkersuisunillu ingerlatsinermut atatillugu suliniutinik aallartitsisinnaallutik. Inatsisartut inatsisiliortuupput, aningaasaliissutinik aalajangersaasarlutik Naalakkersuisunillu nakkutilliillutik. Siunnersuutip akisussaaffiit taakku agguagaanerat allanngortinngilaa, Naalakkersuisulluunniit suliniutinik ataasiakkaanik aallartitsinnginneranni Inatsisartunit akuersissuteqartussanngortinngilai.

Siunertarineqarpoq Inatsisartup suliniutit pingaarutillit paasissutissat naammattut tunngavigalugit malinnaavigisinnaanera nukittorsarneqassasoq, taamaalillunilu ammasuunissaq, akisussaassuseq Inatsisartullu nakkutilliisinnaanerat pitsaanerulersinneqarlutik. Aaqqissuussineq nutaaq naapertuuttoq pilersinneqartariaqarpoq, taamaalilluni allaffissornikkut suliaassat paasissutissanut pisariaqartinneqartunut naleqquttumik annertussuseqarlutik.

Taamatut oqaaseqarlunga siunnersuut Inatsisartunut suliaassanngortippara.

Pisortanut aningaasatigut allaffissornikkullu kingunerisassat:

Malittarisassanik suliaqarnermi AC-fuldmægtigip ukioq ataaseq affarlu sulineranut naapertuuttumik isumalluutinik atuiffiusussatut, tassa 750.000 kr.-it missaannik aningaasartuuteqartussatut naatsorsuutigineqarpoq. Isumalluutit ilaatigut misissueqqissaarinermut, naalakkersuisoqarfiit akornanni ataqatigiissaarinermut kiisalu aalajangersimasumik paasissutissiisarnissamik aaqqissuussinerup ilusilersornissaanut atorneqassapput. Malittarisassat atuutsinneqalerpata Naalakkersuisut aalajangersimasumik paasissutissiisarnissaat ingerlaavartumik allaffissornikkut immikkut isumalluutinik pisariaqartitsissaaq. Aaqqissuussinerup annertussusia, akulikissusaa killilersorneqarneralu apeqqutaallutik Namminersorlutik Oqartussat qitiusumik allaffeqarfiini sulisut ukioq naallugu arlallit sulinerannut naapertuuttumik pisariaqartitsisoqarsinnaavoq. Pissutsit pingaarutillit kisimik ilaatillugit nalunaaruteqartarnerrillu pioreersut uteqqinneqanngippata ingerlaavartumik isumalluutinik atuneq killilersorneqarsinnaavoq.

Namminersortunut aningaasatigut allaffissornikkullu kingunerisassat:

Siunnersuut namminersortunut toqqaannartumik aningaasatigut imaluunniit allaffissornikkut kinguneqassasoq naatsorsuutigineqanngilaq. Politikikkut aningaasatigullu suliniutit annertuut pillugit pisortatigoortumik paasissutissiisarnissaq aaqqissuussaanerulerpat suliffeqarfiit piffissaq ungasinnerusoq eqqarsaatigalugu pilersaarusiornerminni naatsorsuutiginissinnaanerat pitsaanerulersinnaavoq.

Innuttaasunut aningaasatigut allaffissornikkullu kingunerisassat:

Siunnersuut innuttaasut toqqaannartumik aningaasatigut imaluunniit allaffissornikkut kinguneqassasoq naatsorsuutigineqanngilaq. Inatsisartunut aaqqissuussaanerumik paasissutissiisarnissaq ammasuunermik nukittorsaasinnaavoq, innuttaasullu politikikkut suliniutit annertuut malinnaaviginissaannut periarfissaat pitsaanerulersinnaalluni.